

**Siunnersuut: Inatsisartut inatsisaat nr. xx, xx 2011-meersoq Meeqqat illersuisuat aamma Meeqqat pillugit siunnersuisoqatigiit**

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

**Akissuteqaat**

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

**Aappassaaneerera**

Qujanaq Inatsisartut Ilaqutariinnermut Peqqissutsimullu Ataatsimiititaliaannut isumaliutissiissusiornermi pitsaasumik sukumiisumillu sulisimanerannut.

Naalakkersuisut nuannaarutigaat ilaqutariinnermut peqqissutsimullu ataatsimiititaliap amerlanerussuteqarlutik Meeqqat illersuisuat aamma Meeqqat pillugit siunnersuisoqatigiit pillugit siunnersuut akuerineqartussanngorlugu inassutigisimammassuk. Ilaqutariinnermut Peqqissutsimullu Ataatsimiititaliap isumaliutissiissutiminni assigiinngitsunik oqaaseqaateqarsimapput kaammattuisimallutillu Inatsisartut inatsisissaatut siunnersuutip aappassaaneerneqarnissaanut allannguutissanik siunnersuisoqqusillutik. Naalakkersuisut arlalinnik oqaaseqaateqassapput nalunaarutigalugulu Inatsisartut inatsisissaattut siunnersuutip aappassaaneerneqarnissaanut allannguutissatut siunnersuuteqassallutik.

Aallaqqaasiutigalugu oqaatigineqassaaq Naalakkersuisut Naligiissitaanermut inatsit eqqumaffigimmassuk, Meeqqat illersuisussaannik aamma Meeqqat pillugit siunnersuisoqatigiit ilaasortassaat toqqarneqalerpata.

Naalakkersuisut Ilaqutariinnermut Peqqissutsimullu Ataatsimiititaliaq isumaqatigaat § 4, imm. 3, nr. 3 aamma § 7, imm. 1, nr. 3 atorunnaarsinneqarsinnaasut. Aalajangersakkat imaraat Meeqqat illersuisuata aamma Meeqqat pillugit siunnersuisoqatigiit ilaasortaasa ilaat napparsimalersillutik soraarsinneqarsinnaasut, ima napparsimatigilerlutik suliassat siunnersuummi allatorneqarsimasut sularinissaat nukissaqarfigiunnaarlugu. Naalakkersuisut maluginiarpaat Meeqqat illersuisuata imaluunniit ilaasortap soraarsinneqarsinnaaneramik innersuussisoqarsinnaasoq § 4, imm. 3, nr. 4 (massakkut nr. 3-usoq) aamma § 7, imm. 1, nr. 4 (massakkut nr. 3-usoq) innersuussutigalugit, ilaasortat amerlanerussuteqartut isumaqatigiippata, takukkit taakkorpiat pillugit aalajangersakkat.

Naalakkersuisut aamma isumaqarput Meeqqat illersuisuata soraarsinneqarsinnaaneranut innersuussisinnaasut § 4, imm. 3. nr. 4 malillugu amerlassusii arfinilinniit tallimanut ikilisinneqarsinnaasut. Naalakkersuisut aamma isumaqarput Meeqqat illersuisuata soraarsinneqarsinnaaneranut innersuussisussat tallimaappata amerlassusiat naammaginaruusoq, tassami amerlassuseq taanna suli isumaqassammat meeqqat pisinnaatitaaffii pillugit suliffeqarfimmi eqqissisimasoqarlunilu aalaakkaasumik ingerlatsisoqarsinnaassalluni.

Meeqqat pillugit siunnersuisoqatigiit ilaasortaasa amerlassusissaata paatsuunganartuunnginnissaa pillugu Naalackersuisut pissusissamisoorsoraat erseqqissassallugu Meeqqat pillugit siunnersuisoqatigiit ilaasortaat 7-iussammata, tassa Meeqqat illersuisuat ilaasortallu sinneri 6-it.

Aningaasartasaanut tunngatillugu oqaatigineqassaaq Naalackersuisut FFL 2012-ip suliarinerani sulissutigimmassuk meeqqat pisinnaatitaaffii pillugit sulliffeqarfimmut 1 mio. koruuninik saniatigut aningaasaliisoqassasoq, taamaaliornikkut qulakkearniarlugit sulisorisat ingerlatsinermullu sulliviup aningaasasaqarnissaa, siunnersuummi suliasanut naleqqulluarnissamat. Taamaamat sulissutigineqarpoq Meeqqat pisinnaatitaaffii pillugit sullivik aningaasanik katillugit 4.331.000 kr.-nik sinaakkuserneqarnissaa.

Naggataatigut oqaatigineqassaaq ikinnerussuteqartut isumaliutissiisummi oqariartuutaat Naalackersuisut eqqummaariffigimmatigit. Oqaatigineqassaaq MIPI-p suliasai piginnaaneqarfiilu taamaatinniarneqanngimmata. Siunnersuut tunngavigalugu suliasat piginnaaneqarfiillu tamakku meeqqat pisinnaatitaaffii pillugit sullivimmut nuunneqartussaapput. Matumuuna naatsorsuutigineqarpoq meeqqat pisinnaatitaaffii pillugit sullivik pilersinneqassasoq ataatsimut ingerlatsiviusoq sakkortoorlu. Naalackersuisut eqqummaariffigilluinnarpaat paasisanik katersinermi suliasat meeqqat pisinnaatitaaffii pillugit suliffimmi sulii suliarineqassammata saqumisuullutillu.

Matumuuna Naalackersuisut saqqummiuppaat siunnersuutip aappassaaneerneqarnerani allannguutissatut siunnersuut Ilaqutariinnermut Peqqinnissutsimullu Ataatsimiititaliap kissaatigisai malillugit.

Ilaqutariinnermut Peqqissutsimullu Ataatsimiititaliaq Naalackersuisut qutsavigeqqippaat isumaliutissiissusiornerminni sukumiisumik sulisimanerannut, inassutigalugulu siunnersuut allannguutissatut siunnersuummik ilaqartoq Inatsisartut piumassuseqarluarlutik suliarissagaat.